

Trefniadau ar gyfer Comisiynu Gwasanaethau – Cyngor Bwrdeistref Sirol Pen-y-bont ar Ogwr

Blwyddyn archwilio: 2023-24

Dyddiad cyhoeddi: Mehefin 2025

Cyfeirnod y ddogfen: 4958A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg. This document is also available in English.

Cynnwys

Adroddiad cryno

Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronns yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfwrdd ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni nifer o wasanaethau lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Y Gwasanaeth Cymorth sy'n Gysylltiedig â Thai yn Maple Tree House
 - Y Gwasanaeth Cymorth sy'n Gysylltiedig â Thai yn Nhŷ Brynmenyn
 - Estyn y contract ar gyfer Gwasanaethau Casglu Gwastraff

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- Fe gawsom hefyd beth tystiolaeth am drefniadau comisiynu yn y gwasanaethau cymdeithasol a'r broses benderfynu mewn perthynas â gwasanaethau gwastraff, ar ôl estyn y contract
- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn yn ystod mis Tachwedd a mis Rhagfyr 2024.
- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom **nad oes gan y Cyngor drefniadau i'w sicrhau ei hun ei fod yn gyson yn sicrhau gwerth am arian pan fo'n comisiynu gwasanaethau.** Rydym yn nodi isod pam y daethom i'r casgliad hwn.
- 16 Caiff dull comisiynu corfforaethol y Cyngor ei nodi yn ei Ffurflen Gomisiynu. Diben y Ffurflen yw rhoi arweiniad i feysydd gwasanaeth pan ydynt yn caffael gwasanaethau gan gyflenwr gwasanaethau allanol. Nid oes gan y Cyngor unrhyw drefniadau corfforaethol yn gynharach yn y broses gomisiynu ar yr adeg pan fyddai'r Cyngor yn penderfynu a yw, a sut y mae, yn mynd i a gomisiynu gwasanaethau.
- 17 Mae trefniadau comisiynu'r Cyngor yn ei gwneud yn ofynnol rhoi diffiniad eglur o'r gwasanaeth a fydd yn cael ei gomisiynu. Ond nid ydynt yn ei gwneud yn ofynnol darparu rhesymeg eglur dros y gwasanaeth na deilliannau bwriadedig y gwasanaeth. Fodd bynnag, ar gyfer y gwasanaethau a archwiliwyd gennym ni, roedd y Cyngor wedi diffinio'r gwasanaeth ac wedi egluro'r angen am y gwasanaeth, ynghyd â'r deilliannau bwriadedig. Mae sicrhau'n gyson y ceir dealltwriaeth am y gwasanaethau sydd i'w comisiynu, gan gynnwys eu deilliannau bwriadedig, yn bwysig i alluogi'r Cyngor i fonitro wedyn a yw'n sicrhau gwerth am arian.
- 18 Roedd gan yr holl wasanaethau a archwiliwyd gennym ni drefniadau monitro eglur ar gyfer deilliannau bwriadedig y gwasanaethau ac fe wnaethant hefyd nodi sut y bydd eu gwerth am arian yn cael ei asesu. Fodd bynnag, nid yw trefniadau comisiynu'r Cyngor yn ei gwneud yn ofynnol i feysydd gwasanaeth wneud hyn. Mae'n anodd felly i'r Cyngor ei sicrhau ei hun bod gwasanaethau a gomisiynir yn sicrhau gwerth am arian yn gyson.
- 19 Nid oes gan y Cyngor drefniadau i sicrhau ei fod wastad yn cynnal arfarniad cynhwysfawr o'r opsiynau cyn comisiynu gwasanaethau. Dim ond un o'r gwasanaethau a archwiliwyd gennym ni oedd wedi ystyried ystod o opsiynau ar gyfer darparu'r gwasanaeth, gan gynnwys asesiad risg o bob opsiwn. Goleuwyd yr arfarniad o'r opsiynau gan amrywiaeth eang o wybodaeth, a fyddai'n helpu'r Cyngor i ddeall ystod o ffactorau a allai effeithio ar y gwasanaeth a oedd yn cael ei

gomisiynu. Mae peidio â chynnal arfarniad o'r opsiynau bob amser yn golygu nad yw trefniadau'r Cyngor yn sicrhau ei fod yn gyson yn ystyried yr holl opsiynau ar gyfer darparu gwasanaethau. Mae hyn yn cynyddu'r risg y gall y Cyngor ddewis opsiynau nad ydynt yn rhoi'r gwerth gorau am arian. Mae hyn yn arbennig o bwysig ar adeg pan fo'r Cyngor yn profi heriau ariannol sylweddol gyda bwlch cyllido yn y tymor canolig o £44.9 miliwn rhwng 2024-25 a 2027-28².

- 20 Nid yw trefniadau comisiynu'r Cyngor yn ei gwneud yn ofynnol i feysydd gwasanaeth ystyried beth mae hirdymor yn ei golygu yng nghyd-destun gwahanol wasanaethau. Nid ydynt ychwaith yn ei gwneud yn ofynnol i feysydd gwasanaeth ystyried sut y byddant yn taro cydbwysedd rhwng anghenion hirdymor a byrdymor. Dim ond ar gyfer un o'r gwasanaethau a archwiliwyd gennym ni y gallai'r Cyngor ddangos ei fod wedi gwneud hyn. Fodd bynnag, gan nad yw'r Cyngor yn gyson yn ystyried y tymor byr a'r tymor hwy wrth gomisiynu gwasanaethau, ceir risg y bydd yn dewis dulliau nad ydynt yn sicrhau gwerth am arian dros y tymor hwy. Gallai ystyriaethau tymor hwy gynnwys, er enghraifft, darparu sefydlogrwydd i ddarparwyr gwasanaethau neu gyflawni amcanion tymor hwy y gellir eu cyflawni y tu hwnt i gylchoedd cyllid grant sy'n fyrdymor o bosibl.
- 21 Nid oes gan y Cyngor drefniadau i sicrhau'n gyson ei fod yn deall costau llawn gwasanaethau a gomisiynir. Roedd y Cyngor yn deall costau'r sampl o wasanaethau wedi'u comisiynu a archwiliwyd gennym ni. Roedd hefyd wedi cynnwys trefniadau lliniaru pe bai'r cyllid yn lleihau yn y dyfodol. Fodd bynnag, nid oes gan y Cyngor drefniadau i sicrhau'n systematig ei fod yn deall costau oes gyfan yr holl wasanaethau a gomisiynir, na bod costau rheoli contract yn cael eu cynnwys yn y costau hyn. Trwy beidio â sicrhau bod yr holl benderfyniadau comisiynu'n seiliedig ar wybodaeth ariannol gynhwysfawr, ceir risg bod y Cyngor yn gwneud penderfyniadau comisiynu nad ydynt yn sicrhau gwerth am arian.
- 22 Nid yw trefniadau comisiynu'r Cyngor yn sicrhau'n gyson y rhoddir ystyriaeth i'r effeithiau ehangach y gallai gwasanaethau a gomisiynir eu cael fel rhan o'r broses gomisiynu. Caiff penderfyniadau comisiynu ar gyfer gwasanaethau â gwerth o fwy na £5 miliwn eu gwneud gan Cabinet y Cyngor. Mae'n ofynnol bod yr holl adroddiadau i'r Cabinet yn ystyried amcanion llesiant y Cyngor ei hun. Nid oes rhaid cyflwyno adroddiad i'r Cabinet ar wasanaethau a gomisiynir sydd â gwerth is na £5 miliwn. Roedd yr enghreifftiau a archwiliwyd gennym ni islaw'r trothwy o £5 miliwn. Ar gyfer y gwasanaethau hyn, ni chanfuom unrhyw dystiolaeth bod y Cyngor wedi ystyried sut y gallent gyfrannu at ei amcanion llesiant fel rhan o'r broses gomisiynu. Hefyd, nid yw trefniadau comisiynu'r Cyngor yn ei gwneud yn ofynnol i wasanaethau ystyried amcanion llesiant cyrff eraill yn y sector cyhoeddus na'r effaith ar y nodau llesiant cenedlaethol. Trwy beidio ag ystyried goblygiadau ehangach penderfyniadau comisiynu, mae'r Cyngor yn cynyddu'r risg o ddyblygu ac o fethu ag adnabod cyfleoedd i sicrhau manteision lluosog.

² Archwilio Cymru, Cyngor Bwrdeistref Sirol Pen-y-bont ar Ogwr, Adolygiad o Gynaliadwyedd Ariannol, Medi 2024

- 23 Nid yw'r Cyngor yn sicrhau bod penderfyniadau comisiynu'n cael eu goleuo'n gyson gan y rhai y bydd gwasanaethau a gomisiynir yn effeithio'n uniongyrchol ac yn anuniongyrchol arnynt. Canfuom enghreifftiau o feysydd gwasanaeth yn cynnwys partneriaid a defnyddwyr gwasanaethau wrth gomisiynu eu gwasanaethau. Er enghraifft, caiff y prosiectau Cymorth Tai y gwnaethom ni eu harchwilio eu goleuo gan asesiad o'r anghenion ac mae'n ofynnol i'r darparwyr gwasanaethau geisio barn defnyddwyr gwasanaethau. Fodd bynnag, nid yw trefniadau corfforaethol y Cyngor yn ei gwneud yn ofynnol i feysydd gwasanaeth fynd ati'n systematig i ystyried yr ystod lawn o bobl y gallai penderfyniadau comisiynu effeithio arnynt, ac a ddylai gael eu cynnwys ynddynt.
- 24 Mae trefniadau comisiynu'r Cyngor yn ei gwneud yn ofynnol i feysydd gwasanaeth feddwl pa bartneriaid presennol a phartneriaid posibl y gallent weithio gyda hwy i gomisiynu gwasanaethau. Roedd y gwasanaethau y gwnaethom ni eu harchwilio'n gallu darparu enghreifftiau lle'r oeddent wedi mynd ar drywydd cyfleoedd i gydweithio a gweithio mewn partneriaeth. Gall gweithio gyda'r bobl a'r partneriaid iawn helpu'r Cyngor i sicrhau bod ei wasanaethau'n diwallu anghenion ei gymunedau, a bod y gwasanaethau hynny'n cael eu darparu mewn ffordd sy'n cynyddu gwerth am arian i'r eithaf.
- 25 Gan nad oes gan y Cyngor ddull comisiynu corfforaethol cyson ar draws y sefydliad, ni all fynd ati'n rheolaidd i adolygu'r dull hwnnw na sicrhau ei fod yn cael ei ddefnyddio gan bob maes gwasanaeth.
- 26 Nid yw'r Cyngor yn mynd ati'n rheolaidd i rannu gwersi a ddysgwyd o'i ddull comisiynu. Nid oes ganddo ddull corfforaethol na gofyniad i feysydd gwasanaeth rannu gwersi a ddysgwyd. Nid oedd y gwasanaethau a archwiliwyd gennym ni wedi cynnal unrhyw werthusiad ffurfiol o'r gweithgarwch comisiynu. Er bod rhai meysydd gwasanaeth yn gwneud llawer o gomisiynu, mae meysydd eraill yn y Cyngor yn llai profiadol. Trwy beidio â mynd ati'n rheolaidd i adolygu ei drefniadau ar gyfer comisiynu gwasanaethau a rhannu gwersi a ddysgwyd, ceir risg bod y Cyngor yn colli cyfleoedd i wella gwerth am arian ac effaith ei ddull.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

A1 Sefydlu trefniadau comisiynu

Dylai'r Cyngor gryfhau a ffurfioli arfer cyfredol, i'w sicrhau ei hun bod y penderfyniadau y mae'n eu gwneud i gomisiynu gwasanaethau'n cael eu siapio'n gyson gan y canlynol:

- dealltwriaeth am y gwasanaeth sydd i'w gomisiynu a'i ddeilliannau bwriadedig (para 17);
- nodi sut y bydd yn asesu ac yn monitro gwerth am arian gwasanaethau a gomisiynir dros y tymor byr a hwy (para 18);
- arfarniad o'r holl opsiynau i ddarparu'r gwasanaeth o safbwynt darbodaeth, effeithlonrwydd ac effeithiolrwydd dros y tymor byr a hwy (para 19);
- cynllunio dros raddfa amser briodol (para 20);
- dealltwriaeth am y goblygiadau hirdymor o ran adnoddau (para 21);
- sicrhau bod effeithiau ehangach y gwasanaeth yn cael eu cynyddu i'r eithaf (para 22);
- gweithio gyda'r bobl a'r partneriaid iawn i ddylunio a darparu'r gwasanaeth (para 23); a
- rhannu gwersi ar draws y sefydliad (para 25).

A2 Cryfhau'r modd y cydymffurfir â'i drefniadau comisiynu

Er mwyn sicrhau bod dull comisiynu corfforaethol y Cyngor yn cael ei ddefnyddio'n gyson ar draws meysydd gwasanaeth, dylai'r Cyngor gyflwyno trefniadau i fonitro'r modd y cydymffurfir â'i ddull comisiynu corfforaethol (para 25).

A3 Cyflwyno adolygiad rheolaidd o drefniadau comisiynu'r Cyngor

Er mwyn sicrhau bod y Cyngor yn adnabod cyfleoedd i wella gwerth am arian, dylai fynd ati'n rheolaidd i werthuso effeithiolrwydd ei drefniadau comisiynu corfforaethol ar draws y sefydliad (para 25).

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Cwestiynau Lefel 2	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu. • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth; ac – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol.
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol; – trefniadau partneriaeth neu ddulliau o gomisiynu o fewn ac ar draws sectorau; – allanoli'r gwasanaeth i ddarparwr arall trwy ymddiriedolaeth neu drefniant arall; a hefyd – contractio'r gwasanaeth trwy broses dendro. • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir. • Mae'r Cyngor yn cynnwys costau rheoli contract o fewn ei asesiad o opsiynau comisiynu. • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision. • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyffredol a hirdymor sy'n debygol o effeithio ar wasanaethau a gomisiynir.

Cwestiynau Lefel 2	Cwestiynau Lefel 3	Meini Prawf
A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	- Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham. - Mae'r Cyngor yn ystyried sut y bydd yn taro cydbwysedd rhwng anghenion byrdymor a hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill.
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	- Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir. - Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir.
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	- Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir. - Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: – costau a manteision; a hefyd – cynnydd tuag at gerrig milltir a mesurau tymor byr, canolig a hwy.
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon.
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol.

Cwestiynau Lefel 2	Cwestiynau Lefel 3	Meini Prawf
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol.
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys yr amrywiaeth lawn o bobl?	- Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. - Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig.
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau. - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd.
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - i ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu; a - gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau.
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.